

EDITORIAL

Papintason an mga opensiba, palayason an pasista nga militar ha kabaryuhan

Hul-os nga ginkakalipay han mga rebolusyunaryo nga pwersa ngan han hiluag nga masa an magkasunod nga madinaugon nga taktikal nga opensiba han Bagong Hukbong Bayan (BHB) ha mga bungto han Mapanas ngan Catubig ha Northern Samar. Ginlansar ini ha butnga han to-do-atake han Armed Forces of the Philippines (AFP) ha prubinsya ngan pasista nga terorismo ha masa nga parag-uma.

Grabe na gud an kaawod han mga utok-pulbura nga heneral sugad ha kumander han 803rd Infantry Brigade nga hi Colonel Perfecto Peñaredondo, kumander han 8th Infantry Division nga hi Major General Edgardo de Leon, ngan an higtaas nga upisyal han AFP ngan National Task Force (NTF)-Elcac. Ha ira desperation, ginrarakudako nira an pagpasurender ha mga sibilyan ngan kunuhay pagluros han base panmasa han BHB komo mga "kadaugan." Panmuypoy na la ha masa an akos nira ighambog.

Ha kangalas han 8th ID, nagsaad ini nga igdedeploy an lanong nga 3rd IB komo kadugangan nga pwersa ha erya han Pacific kasunod han opensiba ha Mapanas. Unob nga aadto an mga elemento han 20th IB, 63rd IB, 81st Division Reconnaissance Company, ngan 43rd IB nga hadto hul-os nga nakadeploy ha syahan nga distrito han Northern Samar. Mayda liwat mga tropa han Special Action Force han kapulisan. Labot dinhi, gin-gagamit liwat an mga aset ha kahanginan sugad han *drone*, helikopter ngan pan-atake nga mga idro.

Klaro an todo-gerra nga tindog han AFP ngan NTF-Elcac labina ha linya nga "lokal nga kamurayawan" nga ginduduso hini kan Ferdinand "Bongbong" Marcos Jr. Ha ungod, waray dara nga kaupayan, kamurayawan o kauswagan an "lokal nga kamurayawan" kundi pagpasurender, pan-gigipit, ngan delubyo ha kabaryuhan. Sugad hadto, ig-iimponer han militar an paghahadi hini ha mga baryo nga mag-teresulta ha mas grabe nga panalapas ha tawhanon nga katungod



"Papintason...", sundan ha paypay 2

Ambus ha Mapanas, ginsundan han gama ha Catubig

EKSAKTO DUHA KASEMANA kasunod han madinaugon nga taktikal nga opensiba ha Mapanas, Northern Samar, utro nga gin-ambus han Bagong Hukbong Bayan-Rodante Urtal Command (BHB-RUC) an pasista nga militar ha Barangay Osang, Catubig, hadton Hulyo 19. Usa an patay ngan lima nga sundalo han 20th Infantry Battalion an nasamaran, sigon ha inisyal nga report.

Dugang ini nga tampalo ha nawong han 20th IB, 8th Infantry Division, Armed Forces of the Philippines (AFP) ngan National Task Force (NTF)-Elcac, nga wala-tuo an pagpakaraot ha mga opensiba han BHB ngan dirudiretso an panmuypoy ha kabaryuhan han prubinsya.

Usa an Barangay Osang ha unom nga barangay ha Eastern Visayas nga gindeklara hadton 2021 nga "malimpyo" na han impluwensya han rebolusyunaryo nga kagiusan. Tungod hini, ginhimo ini nga "bene-pisyaryo" han ₱20-kamilyon nga balor han saywar nga programa nga Barangay Development Program (BDP).

Mahinunumduman nga gin-ambus han BHB-RUC an mga tropa han 20th IB ngan PNP-Special Action Force hadton Abril ha Barangay San Miguel, Las Navas. Gindeklara liwat hadto an San Miguel komo "cleared" nga barangay.

Ha Western Samar, usa nga pulis an napatay ha aksyon militar han BHB-Arnulfo Ortiz Command hadton Hulyo 16 ha bawnderi han Barangay San Nicolas, San Jose de Buan ngan Barangay Mabuhay, Gandara.

HA KAMATUORAN

Poyde ba salawdan hin kaso nga kriminal han AFP an BHB?

Diri. Diri krimen an mga taktikal nga opensiba han Bagong Hukbong Bayan (BHB), kalakip an mga ambus hadin naglabay ha Barangay Magsaysay, Mapanas ngan Barangay Osang, Catubig, Northern Samar. Mga lehitimo ini nga akto han gerra han BHB komo usa nga pwersa nga nakikiggerra (*belligerent force*) kontra ha mga armado nga tropa han Gubyerno han Republika han Pilipinas (GRP) kalakip an Armed Forces of the Philippines (AFP).

Lehitimo nga target han taktikal nga opensiba an mga tropa han AFP nga armado hin magbakod nga riple ngan may kapas umato. Nag-ooperasyon hira agud lanaton an BHB ngan puypuyon an masa. Diri hira mga "i-nosente nga biktima" sugad han ginpapagawas han AFP. Diri liwat hira pareho han mga parag-uma ngan retirado nga rebolusyunaryo nga ginpatay han AFP ngan ginpagawas nga "inato."

Diri liwat krimen an paggamit han BHB han mga *command-detonated explosive* (CDEx). Nasunod an BHB ha internasyunal nga makatawo nga balaud nga nagtutugot ha CDEx.

Nabuto la ini kun tutuyuan nga pabuthon. Mas maluya ngan guti an lugop hini itanding ha mga 500-kalibras nga "smart bomb" han AFP, nga naghihimo hin luho ha tuna nga maabot 15 kapiye an kahilarum.

Saywar ngan panguwat an katu-yuanan han paginawyaw han AFP nga magsalawad hin kriminal nga kaso kontra ha BHB. Tuyo nira nga pakarauton an BHB ngan pagawason komo mga "kriminal" ngan "terorista." Gin-uuru-utro han AFP an Otta-wa Treaty ngan Geneva Conventions nga sayop an pag-intindi o tuyo nga ginbibirikis an gin-uunod gud hini.

Sigurado an mga kaso nga krimi-

nal nga ginluluto han AFP, igsasalawad kontra ha mga kilala hini nga aktibista nga maiha na nga ginre-*red-tag* ngan ha mga retirado nga rebolusyunaryo, agud tagan rason an hihimuon hini nga panmatay, iligal nga pangaresto ngan hinimu-himo nga engkwentro.

Ha pinakabatakan, duha nga magkaiba nga gubyerno an nagpapailarum ha AFP ngan ha BHB. Waray baratonon an BHB ha dunot nga sistema han hustisya han GRP. Waray liwat ini baratonon ha Commission on Human Rights. Kun maruruyag gud an AFP, poyde ini magsalawad hin reklamo kontra ha BHB ha Joint Monitoring Committee (JMC) giutan han GRP ngan han National Democratic Front of the Philippines (NDFP).

Kundi, tiunan-o ini hihimuon han AFP nga ginsasalikway liwat hini an mga naglabay nga kasarabutan han GRP-NDFP nga amo an naghimo ha JMC? **L**

"Papintason....," *tikang ha paypay 2*

ngan panlasurbo ha pakabuhi han masa nga parag-uma. Ini an karuyag han mga tagsagdon ni Marcos imbes an mas mahinungdanon nga erestorya pankamurayawan ha National Democratic Front of the Philippines (NDFP).

Labot ha pangatake ha kabaryuhan, todo liwat an pangatake han AFP ngan NTF-Elcac ha masmidya. Sige an yawyaw hini ha publiko nga magsasalawad ini hin kaso kontra ha BHB. Ginpapakaraot hini an BHB agud pagawason komo mga ordinaryo nga kriminal imbes nga mga bayani han katawhan, samtang gintatahuban an kalugaringon nga krimen sugad han panmomba, panganyon ngan panmatay han mga parag-uma.

Pagpamatuod an panmilitar nga kadaugan han BHB nga mapaso giha-pon nga ginsusuportahan han masa an rebolusyon. Akos pakyason han masa ngan hukbo an pasista nga larang han AFP pinaagi han ira pagkaurusa ngan determinado nga pag-ato.

Kinahanglan papintason pa han masa ngan BHB an mga opensiba kontra ha pasista nga militar ha kabaryuhan. Kinahanglan pakusgon an ira determinasyon ngan kadig-on ha butnga han pasista nga terorismo han estado. Kinahanglan igsalikway han masa an pasista nga kaman-duan han mga sundalo ngan atuhan an kada pangabuso. Kinahanglan pakusgon pa an BHB

ngan magpadako hin pwersa agud ipasulong an hiluagan ngan sik-on nga ginerilya nga pakiggerra ha kabaryuhan ngan palayason dinhi an pasista nga militar. **L**

